

Ita hotu presiza inan ida

Mensajen ba Foin-sa'e sira – 6 Outubru 2013

Bainhira ha'u-nia tinan 14/15, loron ida, iha festa Na'in Feto nian, profesora husu mai ami atu hakerek orasaun ida ba Maria iha surat-tahan ida. Ikus mai ami tau ami-nia billete ki'ik-oan sira iha lafatik ida no ami tau iha estatua Na'in Feto nia ain.

Tuir mai, ami reza hamutuk, hafoin profesora hahú loke ami-nia billete no lee ami-nia orasaun sira.

Orasaun ruma naruk liu... balun hakerek lista ho ema ne'ebé entrega ba Maria, maibé ida mak badak liu, no ha'u sei hanoin nafatin: "Inan, ami presiza ita!"

Ida ne'e mak orasaun konfiansa nian, hanesan hakilar ida atu husu tulun hodi la aumenta liafuan sira.

Jezús hateten mai ita katak bainhira ita reza la lika uza liafuan bara-barak hanesan gentiu sira; maibé dehan de'it: Ami Aman... no Aman Maromak haree buat ne'ebé subar hela no hatene buat ne'ebé ita presiza.

Nune'e Maria, ne'ebé ita-nia inan, nia hatene ita, hadomi ita, hakarak ba ita buat di'ak hotu ne'ebé inan ida hakarak ba ninia oan sira.

Maibé la bele laran-rua hela! Ita fiar katak Na'in Feto bele tulun ita, nune'e to'o atu dehan ba nia: Ha'u presiza ita!

Iha kasamentu Kana nian, Maria reza mós nune'e: nia haree kaben-na'in sira preokupa tanba falta tua no nia dehan ba Jezús: "Jezús, haree took, tua la iha ona"! Maria nia liafuan segura ne'e manán Jezús nia fuan no mós atan sira ninian: "Imi halo tuir buat ne'ebé Nia haruka".

Orasaun konfiansa nian ne'ebé la duvida, orasaun ida ne'e hetan resposta.

Ita hotu presiza inan ida, ita presiza inan atu moris, atu sai boot, atu hetan dalan loos iha ita-nia moris, atu fahe ksolok, terus, preokupasaun, esperansa sira hamutuk ho Nia.

Don Bosco no Maria Mazzarello halo buat kmanek tanba sira saran an tomak ba Jezús no Maria. Sira hanorin ba sira-nia oan espirituál sira: Sira ne'ebé konfia maka'as iha Jezús no Maria Tulun Na'in sei hatene saida mak milagre! No sira halo duni esperiénsia tanba Maria hatán ba sira-nia konfiansa hodi halo buat kmanek iha sira-nia moris no iha foin-sa'e sira nia moris. Sira nunka duvida kona-ba ninia tulun no sira saran an ba Maria nia prezensa nu'udar inan no matadalan.

Husi tinan 9, Joanzinho rona lia misterioza ida: "Ha'u sei fô Mestra ida ba ó" no nia tuir Maria nia eskola, iha nnia hilin ida-idak.

Maria tulun Don Bosco no Maria Mazzarello la'ós de'it atu hari'i uma sira iha ne'ebé bele halibur foin-sa'e mane no feto sira, ka atu hari'i Uma Kreda sira, Basilica Maria Tulun Na'in nian, maibé nia suporta konstrusaun ida ne'ebé susar no importante liu: ema sira nia formasaun. Maria tulun sira atu fó fali foin-sa'e sira nia dignidade, atu hetan fali konfiansa iha sira-nia an rasik, iha ema seluk, iha Maromak.

Hahalok edukativa mak hanesan obra konstrusaun nian, hari'i nian. Presiza tau uma nia fundasaun metin: konfiansa iha Maromak no iha Na'in Feto no mós konfiansa ba prezente sira ne'ebé Maromak haraik mai ita, konfiansa iha ema seluk.

Don Bosco, Maria Mazzarello mak agrikultór kiak na'in rua, maibé sira hari'I Istitutu ida ne'ebé oras ne'e iha comunidade barak iha Kontinente lima! Sira halo oinsá? Maria Tulun Na'in saran labarik, menina no foin-sa'e sira ba sira na'in rua hodi dehan: "Imi tau matan ba sira, sira ne'e mak ha'u-nia oan sira". No la abandona sira.

Oinsá inan ida bele soe nia oan sira? La bele!

Nune'e Don Bosco halo esperiênsia katak Maria mak fiel hodi gia nia loron-loron, tan ne'e Don Bosco dehan: "Iha Lalehan de'it ita sei hatene buat ne'ebé Maria halo ba ita, hodi hakfodak".

Inan, ha'u presiza ita. Ida ne'e ita-nia orasaun ne'ebé ita hasae hanesan hakilar ida atu husu tulun no Na'in Feto sei hatán ba ita, maibé ita la bele laran-rua kona-ba ninia intervensaun.

Ita husu ba Nia atu tulun ta, la'ós de'it atu hetan isin-di'ak, ba ita-nia estudu, ba servisu, ba ita-nia família sira, ba ita-nia rai, maibé mós atu nia bele suporta ita atu sai sarani loos iha sosiedade ohin loron nian.

Ohin loron ita presiza ema matenek ne'ebé hatene reflète, hatene hanoin, hatene sai kritika hasoru hanoin sira ne'ebé la la'o hamutuk ho valór sarani nian, ema ne'ebé hatene moris iha solidariedade, iha domin konkretu hodi dedika nia an rasik ba ema seluk, ba kiak sira no sira ne'ebé presiza.

Maria la'o hamutuk ho ita nu'udar inan atu lori ita ba Jezús, atu ita bele simu Jezús nia Evanjellu no fó sasin kona-ba Ninia domin ba mundu ohin loron nian.

Inan ha'u presiza ita, atu komprende Maromak nia projetu ba ha'u-nia moris, atu komprende fatin ida ne'ebé ha'u sei hola iha Kreda no sosiedade.

Se imi ruma rona bolun atu tuir Jezús iha moris relijioza ka saserdotál, keta hatán lae, keta taka imi-nia fuan, maibé repete ho konfiansa boot: Inan, ha'u presiza Ita atu tuir Jezús.

No imi hatene saida mak Na'in feto sei hatán? Ha'u mós presiza ó, Lucia, Maria, José... iha mundu iha labarik kiak barak, iha ema sira ne'ebé mesak... foin-sa'e barak ne'ebé la hatene atu ba ne'ebé... ha'u mós presiza ó, ó-nia kriadividade, ó-nia domin forte no aten-barani.

Ha'u presiza ó, maibé ha'u la husik ó, ha'u hamutuk ho ó, ha'u kaer ó-nia liman no ha'u akompaña ó.

Don Bosco no madre Mazzarello simu Maria iha sira-nia uma no Maria hela nafatin ho sira; ohin loron mós Maria iha ne'e, besik imi ida-idak, nia gia imi, no tulun imi atu sai sarani loos no sidadaun onestu.